

समे – 12:25 hrs.

<><><><><><>

Portfolio

प्रधानमंत्री मोदी हुंदे नेतृत्व च नमी सरकार दे मंत्रिमंडल दी घोषणा करी दिती गई ऐ। राजनाथ सिंह होरें गी परतिए रक्षा मंत्रालय दिता गेआ ऐ। अमित शाह होरें गी गृह ते सहकारिता मंत्रालय दिता गेआ। नितिन गडकरी हुंदे कश शिड़क यातायात ते राश्ट्रीय जरनैली शिड़कें सरबंधी मंत्रालय बश्कार रक्खेआ गेआ ऐ। निर्मला सीतारमण होर वित्त मंत्री ते डॉ. एस. जयशंकर होर विदेश मंत्री दे तौर पर गै अपनियां सेवां देडन। पियूष गोयल होरें गी उद्योग ते बपार मंत्रालय धर्मद्र प्रधान होरें गी शिक्षा मंत्रालय गै दिता गेआ ऐ। बीजेपी अध्यक्ष जे.पी नड्डा होरें गी सेहत ते परोआर कल्याण मंत्रालय ते रसायन ते उर्वरक मंत्रालय दिता गेआ ऐ। मध्य प्रदेश दे मुख्ख मंत्री शिवराज सिंह चौहान होर राईबाई ते ग्रामीण विकास मंत्री होडन। अश्विनी वैष्णव होरें गी सूचना ते प्रसारण मंत्रालय दी जिम्मेदारी सौंपी गई ऐ। उंदे कश रेल मंत्रालय बी रौहग। हरियाणा दे साबका मुख्खमंत्री मनोहर लाल खट्टर होरें गी घरें मकाने ते शैहरी मामलें दा मंत्रालय दिता गेआ ऐ। किरेन रिजिजू होर पार्लियामानी मामले सरबंधी मंत्री होडन जिसले कि अन्नपूर्णा देवी होरें गी महिला ते बाल विकास मंत्रालय दा कम्मकाज सौंपेआ गेआ ऐ।

<><><><><><>

PMAY

सरकार 3 करोड़ बाद्दू ग्राएं ते शैहरी परिवारें लेई मकानें दा निर्माण कराने च प्रधानमंत्री आवास योजना तैहत सहायता उपलब्ध कराग। एह फैसला नमीं बनी दी एनडीए दी सरकार दी कल्ल नमीं दिल्ली च लग्गी दी मंत्रिमंडल दी पैहली मीटिंग च लैता गेआ। केंद्र सरकार नै 2015 बरे सवां प्रधानमंत्री आवास योजना लागू कीती दी ऐ। एहदे तैहत हकदार शैहरी ते ग्राएं च रौहने आहल परिवार गी बुनियादी सहूलतें कन्नै मकान दा निर्माण करने च सहायता उपलब्ध कराई जंदी ऐ। इस योजना तैहत पिच्छले 10एं बरें च पात्र गरीब परिवारें लेई कुल 4 करोड़ 21 लक्ख मकानें दा निर्माण कीता जाई चुके दा ऐ।

<><><><><><>

I&B

अश्विनी वैष्णव होरें अज्ज नमीं दिल्ली च सूचना ते प्रसारण मंत्री दा पदभार ग्रहण करी लैता ऐ। सूचना ते प्रसारण राजयमंत्री डॉ. एल. मुरुगन ते सूचना ते प्रसारण मंत्रालय दे सचिव संजय जाजू होरें वैष्णव हुंदा सौआगत कीता। कार्यभार संलाने मगरा पत्रकारें कन्नै गल्ल करदे होई अश्वनी वैष्णव होरें गलाया जे जनता ने इक्क बारी परतिये प्रधानमंत्री नरेंद्र मोदी होरें गी देश दी सेवा करने दा आशीवार्द दिता ऐ।

<><><><><><>

Pak-Wishes

प्रधानमंत्री नरेंद्र मोदी होंरे गलाया ऐ जे भारत दे लोक म्हेशां शांति, सुरक्षा ते प्रगतिशील विचारेंदे हक च रेय न। उनें एह गल्लां पाकिस्तान दे साबका प्रधानमंत्री नवाज शरीफ हुंदे आस्सेआ सोशल मीडिया पोस्ट, जेदे च उनें नरेंद्र मोदी होंरे गी त्री बारी पदभार ग्रहण करने दी ममारकबाद दिती ही, दे परते च आखेआ। मोदी होंरे गलाया जे देश दे लोकें दी सुरक्षा म्हेशां उंदी प्राथमिकता रेई ऐ। शरीफ होंने आखेआ जे मोदी हुंदा लगातार त्री बारी प्रधानमंत्री बनना लोकें दा उंदे उप्पर गैहरे भरोसे गी दर्शांदा ऐ। पाकिस्तान दे प्रधानमंत्री शहवाज शरीफ होंरे बी मोदी होंरे गी प्रधानमंत्री दा पदभार सांभने लेई ममारकबाद दिती जेदे परते च प्रधानमंत्री नरेंद्र मोदी होंरे उंदा शुक्रिया कीता।

<><><><><><>

NH-44

जम्मू-श्रीनगर राश्ट्री जरनैली शिड़क नाशरी ते बनिहाल बशकार किश जरूरी मरम्मत ते रख रखाव दे कम्म दे चलदे अज्ज रातीं गड्डियें दी आओजाई लेई बंद रौहग। आकाशवाणी दे जम्मू संवाददाता नै जानकारी दिती ऐ जे मरम्मत दे कम्म दे चलदे अज्ज संझा 6 बजे दे मगरा जम्मू-श्रीनगर शिड़क एन.एच-44 उप्पर काजीगुंड शा रामबन तगर कुसा किस्म दी गड्डियें दा आओजाई नेई होग। इयां गै नगराटा च संझा 5 बजे थमां ते उधमपुर च संझा 6 बजे थमां गड्डियें दी आवाजाही उप्पर रोक लाई गई ऐ। यातायात विभाग नै यात्रुएं गी इस दौरान इत भेठा यात्रा नेई करने दी सलाह जारी कीती ऐ।

इस बारे होर मती जानकारी लेई यात्रु रामबन दे नियंत्रण इकाई च राबता कायम करी सकदे न। नंबर ऐ 94199-93745, 1800-180-7040

<><><><><><>

Mela

जम्मू-कश्मीर सरकारै 14 जून गी होने आहले खीर भवानी मेले दे मौके उप्पर जम्मू संभाग च कम्म करने आहले कश्मीरी पंडितें दे हक्क च इक्क दिन दी विशेष कैजुअल लीव दी मंजूरी दिती ऐ। इस सरबंध च आम प्रशासनिक विभाग आस्सेआ जारी विज्ञप्ति मुजब जम्मू च कम्म करा रदे कश्मीरी पंडित, जेड़े खीर भवानी मेले च शिरकत करना चाहंदे न, उनेंगी 1 दिन दी विशेष कैजुअल छुट्टी दी सुविधा दिती जाग। तोआई, मुख सचिव अटल डुल्लु होरें खीर भवानी मंदरै दा दौरा लाया ते 14 जून गी होने आहले खीर भवानी मंदरै लेई कीते जा रदे प्रबंधें दा जायजा लैता। उनें सब्बनें विभागें गी आपसी तालमेल बनाइये कम्म करने गी यकीनी बनाने लेई आखेआ।

<><><><><><>

CBSE

केंद्री माध्यमिक शिक्षा बोर्ड नै परामर्श जारी करिए छात्रें ते अभिभावकें गी 2024-25 आले सत्र आस्तै पाइयक्रम, पढ़ने सरबंधी सामग्री ते इस सरबंधे च थहोआ रदी जानकारीएं थवां सौहगा रौहने दी अपील कीती ऐ।

बोर्ड नै छात्रें थवां ऑनलाइन मंचें पर फैलाई जा रदी गलत जानकारीं थवां बचने दी अपील करदे होई आखेआ जे किश आनलाइन पोर्टल ते वेबसाइट पर पराने लिंक सांझा कीते जा रदे न ते ऐसियां खबरां आवा रदियां न जेड़ियां सेई नेई हैन। एह बी आखेआ गोआ ऐ जे बिजन भरोसे आले सूत्रें आस्सेआ दिती जा रदी जानकारी गुमराह करने आली ते गलत होई सकदी ऐ।

<><><><><><>

Heat

मौसम विभाग नै अगले त्रै चार दिनें आस्तै बिहार ते उत्तर प्रदेश च गर्मी पौने दे मद्देनजर चेतावनी जारी कीती ऐ। अगले 5 दिनें च जम्मू खिते, पंजाब, हिमाचल प्रदेश, हरियाणा, चंडीगढ़, दिल्ली, राजस्थान, झारखंड ते ओडिशा दे किश इलाकें च गर्म बहा चलने दी संभावना ऐ। भारतीय मौसम विभाग नै अज्ज थमां जम्मू-कश्मीर च तेल गर्जी पौने दी चेतावनी जारी कीती ऐ। जून 10 थमां 17 तरीक तगर मौसम दे खुशक रौहने ते कुसा-कुसा थाहर हल्की बरखा ते अंधी झक्खड़ दी बी मेद ऐ।

<><><><><><>